

Ue che resist aes malatiis

In strente colaborazion cul Istitût di gjenomiche aplicade, i ricercjadôrs de universitât di Udin a àn creât undis varietât di vîts resistentis aes malatiis. Par doi agns a saran testadis in svareadis areis viticulis talianis: se "a funzionin", intal 2012 a rivin sul marcjât.

A son undis lis gnovis selezions di vîts resistentis aes malatiis creadis de universitât di Udin in colaborazion cul Istitût di gjenomiche aplicade dal Parc scientific di Udin che si preparin a varcâ i confins dal Friûl pe ultime valuzion in diferents areis viticulis talianis. E je la ultime tape prime de regjistrazion des varietâts li dal ministeri des Politichis agriculis e l'inviament de licence pe l'or imission sul marcjât, previodûts a fin 2012.

«Si trate – al sclaris Raffaele Testolin, ideadôr dal progjet intune cun Enrico Peterlunger e

Michele Morgante dal ateneu furlan - di 6 selezions a baule blancje e di 5 selezions a baule rosse otignudis cun incrosament tradizionâl e selezion basade su lis informazions otignudis dal progjet di secuenziament dal gjenome de vît».

Lis vinificazions a son stadis fatis intai laboratoris de Union Taliane Vins di Verone, «un laborator – al va indevant Testolin - sielt dai ricercjadôrs de universitât di Udin pes competencis e la professionalitât altonone dai tecnis di chê struture». I Vivârs cooperatîfs di Raussêt,

leader mondiâi inte produzion di risits di vît e sostignidôrs de iniziative, «a son pronts – al anunzie Testolin - a multiplicâ lis gnovis selezions e lançâlis sui varis marcjâts.»

Il progjet pe produzion de prime varietât certificade di ue di vin resistent aes malatiis al è il risultât di 12 agns di lavôr dai ricercjadôrs dal ateneu di Udin, finanziât dal 1998 de Regjon FVG par un investiment di plui di 2 milions di euros. La ricercje e je stade cun di plui sostignude des Fondazions bancjariis regionâls Crup, Crt e Carigo, des Bancjis di



credit cooperatîf de regjon, dai Vivârs cooperatîfs di Raussêt e produtôrs e consorzis tant che i Vignâi di Zamò, Livio Felluga, Marco Felluga, Venica&Venica Consorzi Cuei.

Intal 2005 il lavôr si è colegât: chel altri grant progjet puartât a tiermin dai ricercjadôrs udinês: i secuenziament dal Dna de vît, finanziât pal 70% di fonts privât regionâi e pal 30% di fonts publics.